



## **Komunikado di Prensa**

### **Fundashon Clean Air Everywhere (FCAE) ta sigui te na final ku kaso den Korte kontra Gobièrnu di Kòrsou pa e kontaminashon di medioambiente i aire.**

Gobièrnu di Kòrsou a anunsiá ku tur problema di kontaminashon di medioambiente i aire lo keda resolvé unabes ku ISLA, BOO i Aqualetra kuminsá uza gas komo kombustibel. Pero no tin ningun garantia ku en bèrdat e kambio pa gas lo tuma lugá, i si ta asina mes, ta un proseso ku ta tuma pa poko 5 pa 10 aña. Ademas, tin otro medida ku Gobièrnu por a tuma, ku lo a redusí e polushon al instante, por ehèmpel uso di kombustibel limpi, kombustibel ku ta kontené ménos ku 1 porshento di suafel. FCAE i mas o ménos 30 habitante ku tin molèster di e huma no ta haña ta hustu ku nan tin ku warda: kada aña ku tarda pa kambia e realidat pa unu positivo desena di hende ta muri, i míles di habitante, mucha i baby ta sufri daño na nan salu.

Pa e motibu ei FCAE i abitantenan di entre otro Wishi, Marchena, Curasol, Blaauw, Klein Sint Michiel i Boca Samí ta kuminsá un kaso di fondo den Korte di Hustisia, den kua nan ta eksigí di Gobièrnu di Kòrsou pa kumpli ku e tratado Europeo pa Derechinan Humano. Den e tratado ei tin poné ku Gobièrnu tin e deber di protehé su siudadanonan kontra por ehèmpel rísikonan di salú. Demandantenan no ta ekskluí ku nan por pidi daño i perhuisio pa daño ku nan a sufri kaba òf lo sufri e próksimo añanan. Si demandantenan no haña rason den Korte aki na Kòrsou, nan lo pone e kaso den man di Korte Europeo pa Derechinan Humano na Staatsburg.


Na 2015 FCAE i SMOC i abitantenan a hiba un kaso di huisio sumario kontra di Gobièrnu di Kòrsou. E tempu ei Hues a rechasá e demandanan pasobra, sigun Hues, Gobièrnu a primintí di kumpli ku mayoria di e eksigensianan di e demandantenan. Esei a resultá di no ta kuadra ku bèrdat: manera sa sosedé hopi bia, Gobièrnu no a kumpli ku e promesanan ku Gobièrnu a hasi dilanti di Hues. E eksigensia di e demandantenan tabata entre otro un investigashon di salú, investigashon tokante e sustansia bèrdè i dunamentu di informashon tokante e sustansia bèrdè, i limitashon di fakelmentu.

Kòrsou tambe ta mará na e Tratado Europeo pa Derechinan Humano. Dos hurista prominente tabatin krítika severo riba e veredikto den e kaso sumario. E huristanan a konstatá ku en bèrdat a peka na un manera flagrante kontra e Tratado Europeo pa Derechinan Humano.

Ta tristu konstatá despues di mas ku un aña ku Gobièrnu a purba tuma tantu Hues komo e abitantenan ku ta biba den e huma hasi kèns: Gobièrnu no a kumpli ku ningun di su promesanan. Al kontrario. E molèster di holó malu, e sustansia bèrdè, i emishon di dióksido



di suafel a bira solamente mas serio i ta hasi medida di korekshon mas urgente. Ta violá tur norma nashonal i internashonal, i Ministerio di Salú Medioambiente i Naturalesa apénas ta hasi algu kontra di esei.



*Nota: e gráfiko aki ta pone e norma internashonal di WHO banda di e norma ku ti den lei aki na Kòrsou, i loke a keda midí banda di otro. E norma den lei na Kòrsou ta hopi antikuá, (el a keda establecí na 1979) ta hopi ménos eksigente ku esun internashonal, i mester konta pa Isla, BOO, i Aquallectra huntu.*

Hulanda a pone hopi preshon riba Gobièrnu di Kòrsou pa hasi un investigashon na Isla i BOO pa inventarisá kiko por hasi pa remediá e situashon. Manera nos sa, esei no ta enserá ningun garantia ku en bèrdat Gobièrnu lo sigui e rekomendashonnan ku sali for di e investigashon. Nos eksperensia a siña nos ku e rekomendashonnan lo disparsé den lachinan hundu di Gobièrnu, den kua ya kaba tin desena di rapòrt ku a traha for di 1979.

E kaso den Korte di abitantenan huntu ku FCAE mester tin komo resultado ku di bèrdat ta kumpli ku normanan básiko i ku siudadanonan ta haña protekshon kontra di polushon serio di aire i medioambiente. Señora mr. Sandra in 't Veld ta abogado pa FCAE i abitantenan i ta konta ku sosten di un tim di Stibbe Advocaten Amsterdam.

Bo por tuma nota di e petishon na Korte, detaye i investigashonnan i rapòrtnan na:

<http://www.cleanaireverywhere.com/bodemprocedure>

Pa mas informashon: [info@cleanaireverywhere.com](mailto:info@cleanaireverywhere.com)